

L'HONNEUR.

2.

P R E M I E R

D I A L O G U E D U

POLEMOPHILE.

Avec deux Epistres appartenantes à ce traité: l'une,
de la preference des Platoniciens aux autres
Philosophes: l'autre, des degrez
de perfection.

Par ANT. D'VRFE', *Abbé de la Chaze-Dieu,
& Prieur de Mont-verdun.*



A L T O N
PAR I A Q V E S R O V S S I N .

M. D. X C I I .

THE NEW YORK

LIBRARY

of the City of New York
and the County of New York
in the State of New York

For the use of the
City of New York



BY JACQUES ROSSIN
M. B. XCEL



A MONSEIGNEVR,
MONSEIGNEVR
LE DVC DE NEMOVRS,
ET DE GENEVOIS,
Pair de France.



MONSEIGNEVR,
Depuis que par vostre commandement ie reuins de Bourgongne, ie n'auoy iamais peu dōner un seul iour à mes Musēs, la calamité de ce temps & de ce pays m'occupant, tout des pēssers de la guerre: iusques à ce que vostre grandeur ayant par son arriuee intimidé l'ennemy, & à moy par mesme moyen donné loisir de r'auoir un peu mon haleine, & reprēdre les anciennes erres de mon estude: i'ay façonné ce traicté de L'HONNEVR, rude à la verité, & mal poli: mais qui toutesfois n'est deu qu'à vous seul, autheur de la tranquillité qui l'a fait enfanter, & en qui reluit infiniment ce lustre de

*Vertu, qui en est le ſuiect. Receuez-le doncques,
Monſeigneur, avec ce bon viſage que requiert, non
ſon merite, mais voſtre grandeur, qui (à l'imitation
de la Diuinité) doit meſurer les dons ſeulement
par la deuotion de celuy qui les offre: attendant que
par quelque plus ſolide eſſect vous puiſſiez recognoi-
ſtre, que ie ſuis*

Votre tres-humble ſeruiteur,

ANTOINE, Abbé
de la Chaze-Dieu.

SVR LE PREMIER POLEMOPHILE
DE MONSIEVR DE LA
Chaze-Dieu.

EN cè siecle de bronze où tout va pesle-mesle,
Où la sainte Vertu n'ose paroistre au iour,
Le vice en exilant l'honneur de son seiour,
Abarriqué la porte à la gloire immortelle.

On cherche ores l'honneur au prix d'une querelle,
Aux mestiers de Pallas, aux hasards de l'A-
mour,
Aux flux & aux reflux des faueurs de la Cour,
Mais son vol est plus haut, sa demeure est plus
belle.

VRFE', donc emporté par un ectase saint
Sur les luyfans lambris de ce ciel qui tout ceint
Graue, docte, disert en l'auril de son aage,

Defriche en ses discours un chemin peu battu,
Et monstre qu'on ne peut sans la belle Vertu,
Meriter de l'honneur la flamboyante image.

PIERRE MATTHIEV, Doct.ès Droiçts.

AV MESME SEIGNEVR.

L Es supposés fauoris de la docte Deesse,
Les chantres nourrissons du pere Cynthien,
Les subtils sectateurs du vif Stagirien,
Les solides cerueaux de la sainte Sagesse,
Visent tous à l'honneur: pour l'Honneur la Noblesse
Prefere le combat à l'archer Paphien:
L'ouurier rôpt pour l'Honneur le marbre Parien:
Le Peintre pour l'honneur le corps en relief dresse.
URFE', soit que l'Honneur attire tes esprits
Alaisser aux nepueux si solides escrits,
Tu esbauches l'Honneur pour premier frôtiſpice.
Pour atteindre l'Honneur ià gravé dans ton cœur,
L'Honneur est ton ſuiect, ton plan, ton edifice:
Mais non l'Honneur mondain, ains le diuin
Honneur.

M. HONNORE' L'AMY, Doct. Med.



DE L'HONNEVR.

DIALOGVE.



L'VRANOPHILE las d'estudier, sortoit de son Cabinet passe, morne, refrogné, & comme resuant à quelque poinct trop difficile de sa Philosophie: quād voicy suruenir le Polemophile son compaignon, qui (vn peu plus gaillard, brusque, & deliberé que de coustume) s'adresse à l'Vranophile avec vn tel langage: Et quoy? ne cesserez-vous iamais d'alambicquer vostre cerueau apres ces friuoles, inutiles, & chimeriques contemplations? Vous mesme m'avez enseigné autresfois, que les plus parfaictes actions sont les plus imparfaictes, lors qu'elles sont exercees hors de leur saison, d'autant qu'elles n'atteignent leur but naturel, d'où depend toute leur perfection. Or rien ne scauroit estre plus hors de saison parmy ces cruelles & sanglantes guerres ciuiles, que s'appliquer aux sciences abstraictes, qui se contentent de voir ce qui en est, sans descendre aux remedes. Et puis le repos (qui est le plus requis à l'estude) fut-il iamais moindre, que durant ceste generale combustion de toute nostre France? Nous voyons que la

Qu'è temps
de guerre il
faut quit
rer l'estude
pour la
guerre.

nature a donné aux bestes, non seulement le moyen de iouyr de leur perfection lors qu'on le leur permet, mais aussi la puissance de forcer les empeschemens de ceste iouissance : & les armes qu'elle a distribuées aux autres animaux par parcelles, elle nous les a toutes en vn coup données, nous ornant de la raison : par qui l'art militaire a pris pied entre les hommes, pour repousser toutes les difficultez opposées à la paix, & aux biens qui l'accompagnent. Laissons doncques maintenant ceste vaine oisiveté, cedons à la fortune, qui nous conuie à changer de façon de viure, & s'efforcer de rōpre par les armes les obstacles de la tranquillité que requierent nos études, n'estant moindre folie estudier parmy ces guerres, que vouloir faire du soldat en paix. Aussi bien est-il impossible d'acquérir maintenāt par les lettres aucune reputation : car l'esprit des grands entierement occupé à la force & violence, n'a ny le vouloir, ny le loisir de songer à nos Muses. Parquoy il vaut mieux fuir de ces tenebres, & se cōstituer en vn estat où nos actions reluisent deuant tout le monde, comme est celuy de la guerre. Pour moy, i'y suis entierement resolu, & desireroy fort que vous fussiez de la partie, pour n'estre contraint de vous fausser compagnie :

Qu'il faut auoir esgard à la disposition des personnes qu'on veut dissuader de quelque chose.

L'Vranophile, qui auoit tousiours reconnu son cōpagnon pour fort actif, ne trouua guiere estrange ceste sienne delibération : & l'y voyant si eschauffé, ne s'amusa point à l'en dissuader, comme font aucuns, qui sans auoir esgard à la qualité & disposition des person

personnes, de prime abordée se mettent inconsidérément à les prescher asprement de leurs vices : au lieu qu'en la guérison de l'ame ils deuroient imiter les Chirurgiens du corps, qui auant qu'vser des medicamens forts & violents, appliquent premièrement les lenitifs pour adoucir la douleur, & inflammation de la playe: ce que n'observant pas ces prescheurs mal aduisez, produisent le plus souuét effects contraires à leur intention : car tout ainsi que la langue infectée de l'humeur cholerique, iuge les plus douces viandes, ameres : de mesme les personnes mal disposées, conuertissent en mal ce qui de soy-mesme est le plus salubre. L'Vranophile donc craignant de faillir en cela, luy repliqua seulement: Je vous remercie du desir que vous auez de me tenir tousiours honoré de vostre compagnie, laquelle de mon costé i'ay tousiours fort ayinée: & ce seroit la seule cause qui me pourroit diuertir de mes estudes, pour prendre les armes: car toutes les raisons que vous m'auez alleguées, encores que peut-estre elles ayēt quelque force pour vostre regard, si est-ce que pour le mien elles me semblent (sauf vostre correction) de fort petite efficace, estant (comme ie suis) impatient de tout trauail, & d'une complexion de verre, par maniere de dire: si bien que ne pouuant apporter aucun aduancement à nostre cause, il est beaucoup mieux feant que ie continue en cest oisif labour, & laborieuse oisiveté (à quoy ie me recognoy plus propre) que si ie faisoys comme le chien d'Esope, quittant le certain pour l'incertain, & à la

fin perdât tout. Mais parce que ie desire vostre bien, & vous avez tousiours daigné iusques icy prendre aduis de moy de toutes vos actions, ie vous prie ne trouuer point mauuais si ie m'enquiers de vostre intention vn peu plus particulièrement, peut-estre, que ie ne deuroy, & me dire quelle est la cause, qui vous induit principalement à prendre les armes.

Inconstance
de quelques
vns.

Car vous ayant tousiours recogneu pour personne qui se guide par raison, ie ne voudroy iamais attribuer ceste vostre nouuelle entreprinse à vne certaine legereté de cerueau, qui faict souler des choses presentes, pour aspirer sans fin aux futures, empeschant qu'on ne puisse s'arrester à vne particuliere vacation: mais faisant courir de l'vne à l'autre, si bien qu'à la fin embrassant plusieurs choses on ne restreint rien, & demeure son apprentif en tous estats. Ie ne pense pas aussi que ce soit pour croistre en moyens, estant vne fin entierement indigne d'un cœur si genereux, comme est le vostre. Le Polemophile alors interrompant ce propos: car sa viuacité naturelle, accompagnée d'une ieunesse inexperiencee, le rendoit extremement prompt: ja à Dieu ne plaise, dit-il, que ie me propose iamais vn tel but en mes actions: & puis, nous en voyons bien autant s'appauurir à la guerre, que s'enrichir. La fin doncques où tend ceste mienne entreprise, n'est pas vne seule (pour vous en dire la saine verité) mais deux ensemble: l'une principale, qui est l'amour de mon Dieu, & de ma Religion, qu'on tasche bannir de ce Royaume iadis treschrestien: l'autre depend, & est

Vraye intention
d'un G.
tilhomme
Chrestien
allant à la
guerre.

comme attachee à ceste cy, qui est l'accroissement de mon honneur, & reputation. Vrayement (repliqua l'Vranophile) ie suis tres-aïse de vous voir conduit d'une intention si digne d'un Gentilhomme Chrestien: car comme on doit viser à la manutention de l'honneur de Dieu, entant que Chrestien; de mesme aussi doit on conseruer son honneur particulier, entât que Gentilhomme. Mais ie voudroy bien sçauoir si vous vous abusés point en ce nom d'honneur, comme font la plus part des hommes d'aujourd'huy. Je suis tres-aïse (respond le Polemophile) que vous soyiez entré de vostre propre mouuement en ces erres, esquelles i'auoy deliberé vous pousser en toute maniere auant que commencer mon voyage: car pour ne vous en rien dissimuler, il n'y a chose qui me tienne plus irresolu & en suspends, que la cognoissance de cest honneur tant honoré, & tant familier en la bouche d'un chacun. Il est bien vray que pour ceste heure ie me forme par ce nom vne certaine opiniõ que plusieurs conceuans d'une personne, l'estiment, loüent, & honorent par dessus le vulgaire. Mais puis venant à me ressouuenir que les hommes sçauãs exaltent si fort l'honneur, qu'ils luy postposent la vie, & l'appellent loyer, & salaire de la vertu: ie me resouls que, ou ce n'est pas ce que ie pense, ou ils se font grandement abusez: Car quelle apparence y a il qu'on fasse tant d'estat d'un bien si fressle & caduc, comme est celuy là? Quelle apparence y a il qu'on postpose le bien interieur de la vie à ce bien exterieur, qui est telle-

Difficultez
de l'honneur.

ment en la main de fortune, qué nous en voyons beaucoup de tres-vertueux viure sans reputation quelconque, & d'autres faire seulement deux ou trois bonnes boutees en leur vie, qui sont estimez des Cefars, des Alexandres? Et puis cest honneur sera le but de la vertu, qui domine non seulement à la fortune, mais aussi au destin? Certes ce seroit vne chose trop cruelle: & aussi qu'il fallut necessairemēt que la vertu se conformast au goust & iugement corrópu des mauuais, pour en estre louee, ou qu'elle decheur de sa fin pretendue, le cours de sa gloire estant d'autant retranché. Qui me faict vous supplier tres-affectueusement de me donner à entendre la vraye nature de l'honneur, & vous ferez cause d'un tres-grand bien pour moy: Car vous sçauiez bien qu'ignorant le but où nous deuons mirer en nos actions, & varians en iceluy, rien ne peut estre faict que temerairement & contre les loix de sagesse, chancelans en tous nos desportemens, comme ceux qui ont le chef troublé, ont aussi les mouuemens du corps tous desreglez. Mais sur tout souuenez vous maintenant d'vser de vostre façon accoustumee, qui est de rechercher les causes de chascune chose iusqu'à leur premiere source, & non pas les raconter nuement par maniere d'histoires: ny aussi les enfler d'amplifications rhetoriciennes vuydes de belles conceptions: Ainsi vous m'aurez durant vostre propos pour tres-attétif auditeur, & apres auoir pris pour moy ceste peine, pour tres-obligé seruiteur. Reseruez pour les estrangiers toutes ces belles

Cōbien importe la
cognoissance
de la fin en
toutes a-
ctions.

ceremonies (replique l'Vranophile) desquelles si ie me vouloy ayder, ie pourroy bien legitimement m'excuser d'une entreprinse si inégale à mes forces; qui d'avantage suis las de l'estude precedant, inaccoustumé au langage François, & pris à l'improvisite: Mais ià à Dieu ne plaise qu'usant d'estrangeté en vostre endroit, & ne vous communiquant pas ce peu que ie puis, ie viole les droicts de nostre ancienne amitié, qui semble deuoir admettre vne generale communication de toutes conceptions. Et parce que ceste matiere si scabreuse ne se peut esbaucher qu'avec longueur de temps, ie suis d'aduis que nous nous alliôs asséoir sous ces arbres verdoyans, qui confinent nostre plaisant Allier, à fin que la disgrâce de mes paroles soit en quelque sorte temperee par la grace du lieu. Le Polemophile appreuuant son conseil, ils descendirent du roc sur lequel estoit bastie leur demeure, par vne creuasse naturellement entaillée de certains degrez, qu'on eust iugez estre artificiels: & apres auoir quelque temps tournoyé çà & là, en fin ils se trouuerent à l'entree d'une prairie esmaillee de diuerses fleurs, & costoyee d'un clair ruisseau, qui la formoit par son enceinte en mode d'un demy cercle, & d'une viste course s'alloit mesler dans Allier: Mais ce qui rendoit ce lieu plus agreable estoit l'ombrage espais des spatieux ormes, sur qui on oyoit d'ordinaire mille gentils oyselets desgoiser mignardement leur rainage. Estans donc venus s'asséoir en ce lieu, l'Vranophile (qui tout le long du chemin auoit resué

profon

profondement à ce qu'il deuoit dire) demeura quelque temps coy, & tout ramassé en son esprit: En fin comme s'esueillant d'un profond sommeil, il commença ainsi:

L'VRANOPHILE. Quand ie vien à considerer les erreurs infinis qui prennent racine en nostre entendement sous couleur de tres-apparentes veritez; ie me laisse quelque fois emporter à l'opinion de ceux, qui nous dénieient l'asseuree cognoissance d'aucune sincere verité. Et mesme maintenât qu'auuez vous allegué contre l'honneur, qui le fasse paroistre plus contemptible, que sa fresse & caduque inconstance? & toutesfois de là on peut aussi tirer consequence au contraire d'une extreme sienne perfection: car coustumierement ce qui est plus accompli, est aussi plus delicat & perissable: les pointes plus aiguës sont plus faciles à se reboucher: la plus parfaite blancheur se tache plus aisément: la meilleure complexion est aussi plus suiecte à diuerses alterations: les natures douces de libre election errent plus coustumierement, que celles qui du tout auengles suyuent le seul instinct de nature: & mesmes nous sçauons par les Sainctes lettres, que le plus noble des Anges fut le premier qui faillit. Toutesfois ie ne veux pas que vous arrestât à ceste response, vous croyez que l'honneur soit si perissable comme vous l'auiez depeint, car il ne depend point du diuers iugement des personnes qui espluchent les actions d'autrui: mais seulement de la vertu, son origine, & ne se pert que par la perte: si bien que tout

Les choses
plus perissables
sont souuent les plus
parfaites.

L'honneur
ne depend du
diuers iugement
d'un
chacun.

trib
qnap
noto

tout ainsi que la representation d'un visage dans l'eau demeure stable tant que le visage ne se bouge, l'eau cependant s'escoulant d'une perpetuelle inconstance: de mesme l'honneur demeure stable parmy l'inconstance des humains iugemens, tant que son fondement & principe (qui est la vertu) ne se varie point.

LE POLEMOPHILE. Je ne vous lairray passer plus outre, que vous ne m'ayez monstré comment le principe de l'honneur en general soit la vertu, veu que nous en voyons une infinité, qui n'estans pas à la verité vertueux, mais seulement en apparence, ont autant ou plus de reputation, que s'ils l'estoyent à bon escient.

De l'honneur de ceux qui ne sont vertueux qu'en apparence.

L'VRANOPHILE. Je vous aduoüe que l'honneur (comme aussi toutes les autres perfections) peut estre falsifié: mais maintenant ie ne parle pas du faux honneur, qui prend source de quelque vice pallié sous le masque exterior de vertu: C'est le vray que ie veux que vous consideriez avec moy, lequel se fonde en la seule vraye vertu, l'autre ne meritant le tiltre d'honneur, sinon comme l'image d'un Prince est nommée le Prince: Car comme elle ne retient que l'exterieure figure du Prince, vuyde de son ame interieure: aussi le faux honneur n'a seulement que l'apparence exterieure de l'honneur, destituee de son ame, qui est la vertu.

LE POLEMOPHILE. Pourquoy appelez vous vray, celuy qui naist de la vertu, & l'autre faux, non pas au contraire?

L'VRANOPHILE. Par-ce que la verité de chascune chose n'est rien sinon la conformité qu'elle a à ses princi-

pes interieurs, & la fausseté n'est rien sinon sa diuision & esloignement d'auec eux: quel estimez vous l'or faux, sinon celuy qui ayant exterieurement la couleur, & lustre de l'or, obtient toutesfois l'interieure substance de quelque autre metal? De mesme il y a de la fausseté, quand ce lustre exterieur de vertu que nous appellons honneur, prend source d'autre chose que de la sincere vertu. **LE POLEMOPHILE.** Je desireroiy fort que vous m'expliquissiez, comment l'honneur est le lustre exterieur de vertu? **L'VRANOPHILE.** Si ie ne craignoy de vous estre trop ennuyeux, ie me licencieroy de m'estendre sur ce propos, comme vous voulez: Mais il faut reprendre le fil de nostre discours de si haut, que i'abuseroiy trop long temps de la patience que vous auez à m'escouter. **LE POLEMOPHILE.** Non, non, n'ayez soucy de cela: car ie puis pour mon regard veritablement dire de voz parolles ce que Ciceron disoit des oraisons de Demosthene, que les plus prolixes sont les plus belles. **L'VRANOPHILE.** Puis qu'ainsi est, ie vous demande si iamais vous auez leu dans Platon, que l'image du Bon est la Lumiere? **LE POLEMOPHILE.** Ouy vrayement, & pourquoy? **L'VRANOPHILE.** Vous estes vous iamais enquis de l'interpretation de ceste sentence? **LE POLEMOPHILE.** Quelque Platonicien dernièrement vouloit debatre qu'elle contenoit les mysteres de la diuine Trinité, disant que par le Bon est entendu le Pere, & le Fils par la Lumiere, ce qui s'accorde à nos Docteurs, car l'Euangeliste dict que le

Verbe

L'image du
Bon est la
Lumiere.

Explicatio
Theologi-
que reiet-
tec.

Verbe (c'est à dire le Fils) est la vraye Lumiere qui illumine tout homme venant en ce monde. Et le Fils mesme tesmoigne que le nom de Bon n'est deu qu'à son Pere seulement: Si bien que Platon auroit voulu dire qu'en la Trinité le Fils est image du Pere, axiome tres-celebre entre nos Theologiens, & tiré de diuers passages de la Saincte Escriture. Pour moy, ie ne croy pas que Platon aye cogneu les mysteres de la Trinité: Et s'il parle quelque fois d'un Fils de Dieu, d'un Verbe, il entend la substance intellectuelle, qui est du tout abstraicte du corps, & qui cede de beaucoup à la Diuinité, d'où elle procede: Mais à quel propos tout cecy? L'VRANOPHILE. Vous le verrez: & est-ce ainsi que vous me tenez promesse d'attendre avec patience l'ysue de noz propos, repris par vostre commandement d'un peu plus loing que de coustume? LE POLEMO-
PHILE. Pardonnez moy pour ceste fois, & croyez que dorenavant ie vous donrray autant d'occasion de louer ma patience, que vous en pourriez auoir eu de l'accuser. L'VRANOPHILE. Donques ie vous diray, qu'encores que ie prefere de beaucoup la secte Platonique à toutes les autres, si ne suis-je pas si aveuglé de son amitié que ie veuille faire comme plusieurs qui s'efforcent de monstrier, non seulement tout ce qui a esté dit par Platon estre veritable: mais encor tout ce qui est veritable auoir esté dit par Platon, & mesme les principaux poincts de la foy Chrestienne: d'où est né (comme ie croy) l'Arrianisme, car plusieurs prenant pour le mesme le

Erreur de
plusieurs Pla-
toniciens.

L'Arrianisme
me prouenu
de Platon
mal inter-
preté.

Verbe fils du Bon, duquel Platon parle, & la secõde personne de la Trinité, que nos Theologiens appellent aussi Fils & Verbe, ont dit le Fils estre moindre que le Pere, comme admet Platon, entendant par le Fils, celle nature que nous appellõs Intelligence, comme vous avez tresbien dit : Et voylà pourquoy les Docteurs qui ont resisté à l'impieté Arriene, de-
 testent fort souuent la Philosophie, & nommément Tertullien : l'ay regret (dit-il) en bonne foy, que Platon soit deuenu celuy, qui donne goust & faueur aux heresies : mais le defaut n'estoit pas en Platon, ains en ceux qui ne l'entendoyent pas bien. Par ain-
 si pour reuenir à nostre propos, à mon aduis il ne parle pas de la Trinité en celle sentence, mais seu-
 lement de la lumiere qui vulgairement esclaire à noz yeux, laquelle sur tout imite fort nayfument la nature de la Bonté. Ce que vous recognoistrez aisément, si vous considerez que la plus remarqua-
 ble propriété de la lumiere est de ietter tousiours à proportion de sa grandeur quelque lucur, & splen-
 deur exterieure : au contraire les tenebres ne s'esten-
 dent que par la contraction de la lumiere, n'estans qu'un sien defaut. De mesme toute bonté espend selon sa grandeur, certains exterieurs rayons, indi-
 ces asseurez de sa grandeur ou petitesse interieure : ainsi de chasque essence naissent quelques proprie-
 tez & puissances, & des puissances les actions, & des actions quelque effect. Au contraire le Mal est re-
 tiré en soy, & (comme dit vn docte personnage, du faux) est noir & obscur en ses extremittez : d'où se
 peut

Ressemblā-
 ce de la lu-
 miere à la
 Bonté.

peut entendre pourquoy Dieu (autheur de toute bonté) est appellé pere des lumieres, le Diable au cōtraire (autheur de tout mal) prince des tenebres, & l'enfer (en qui regne toute infelicité) tenebres exterieures. Maintenant ie vous veux dire à quel propos i'allegue tout cecy ; & pource sçachez que la vraye bonté de nostre ame est la vertu : Car comme la bonté diuine consiste en son vnité indiuisible, de mesme la bonté de chasque creature (qui procede de Dieu, comme les nombres de l'vnité) consiste en l'vnion des parties dont elle est composee: Or l'vnion, ordre, & bonne disposition des parties de l'ame, c'est à dire du sens & de la raison, n'est autre que la vertu; tellement que nostre ame est comme vn instrument de musique, duquel les chordes sont les parties sensitiue & raisonnable, qui estant tellement accordees qu'il n'en resulte aucune dissonnance & inegalité disproportionnee, rendent vne harmonie plus que celeste, en qui gist la vertu, tout ainsi que le vice cōsiste en l'excez d'une chorde sur l'autre, c'est à dire, de la partie sensitiue sur la raisonnable. Ainsi donques estant la vertu la iuste proportion & symetrie des nombres musicaux, dont l'ame est composee, elle est aussi sa perfection & bonté. Parquoy tout ainsi que la bonté en general est semblable à la lumiere: aussi la bonté de l'ame, c'est à dire, la vertu, est comme la lumiere de l'ame, obtenant semblables proprietéz. LE POLEMOPHILE. Si est-ce que si vous voulez accorder vos propos, elle ne sera pas semblable à l'obiet de la veüe, mais à celui de

La bonté de
nostre ame
est la vertu.

l'ouye: au son, dy-ie, & non pas à la lumiere: d'autant que vous l'auiez tousiours appelée harmonie & consonance. L'VRANOPHILE. C'est parce que non seulement la lumiere, mais aussi le son harmonieux est image de la bôte, au moins de celle qui est créée, comme celle de l'ame, dont il est question.

LE POLEMOPHILE. Mais quelle apparence y a-il d'inferer vne chose estre semblable à la lumiere, de ce qu'elle est semblable à l'harmonie? Car à ce conte il faudroit dire que l'harmonie eust quelque affinité avec la lumiere, ains qu'elle fust la lumiere mesme, n'estans ny l'une ne l'autre diuerse d'un troisieme, qui est la Vertu. L'VRANOPHILE. Aussi

Tout ce qui
est lumi-
neux, est
comme har-
monieux.

sans doubte tout ce qui est lumineux est comme harmonieux. LE POLEMOPHILE. Je ne me le puis persuader si vous ne m'alleguez quelque autre chose. L'VRANOPHILE. Ne voyez-vous pas que ceste qualité de lumiere ne naist qu'és corps reduits à un parfaict temperament de diuerses formes corporelles assemblees, comme à vne harmonie de diuers sons? Regardez les cieux: regardez aussi la beauté des corps elementaires, qui n'est rien qu'une participation de lumiere; n'est elle-pas tant plus grâde, tant plus le temperament desdicts corps est harmonieux & bien complexionné? ains ne gist elle-pas elle mesme en vne certaine harmonie & concordance des couleurs, & des membres? LE POLEMOPHILE. Ouy, mais comment monstrerez-vous que la beauté prouienne de la lumiere? car ie ne doubte point de l'affinité qu'elle a avec l'harmonie.

L'VRA

La beauté
prouient de
la lumiere.

L'VRANOPHILE. Ceste bonne symmetrie des couleurs qu'est ce sinō vne iuste & proportionnee participation de lumiere par vn corps opaque? Ceste bonne proportion des parties du corps, ne prouient elle pas des esprits vitaux, qui les ont premierement formees & distinguees? Ceste grace es mouuemens du corps ne prouient elle pas aussi des esprits motifs? Bref ceste attrayante douceur des yeux, & leur viuacité ne prend elle pas sa source de celle espee d'esprits qu'on appelle opticques? Or ces esprits interposez entre l'ame & le corps elementaire, tout ainsi qu'ils respondent en proportion aux cieux, selon Aristote; aussi sont ils les vrayz sieges de la lumiere du petit monde, qui est l'homme, comme les cieux du grand monde. LE POLEMOPHILE. Ie reste maintenant satisfait touchant ce poinct, & vous accorde que la vertu est la bonté de l'ame, & par consequent comme sa lumiere. Parquoy continuez vostre propos, car ie ne voy point encores où doit reüssir tout cecy. L'VRANOPHILE. Ceste interieure bonté de l'esprit que nous appellons vertu, retenant la propriété cy dessus expliquée de la lumiere, iette exterieurement vn certain lustre, qui comme prouenant d'une perfection de l'esprit, n'est aussi apparent qu'à l'œil de l'esprit: Parquoy l'œil de l'esprit estant le iugement & opinion qu'il a des choses; qui ne voit que ce rayon de la vertu n'est rien sinon vne sienne manifestation & euidence, qui imprime vne bōne opinion & estime de l'hōme vertueux en l'esprit d'vn chascun qui en est capable?

Honneur
lustre de
la vertu.

ble? Et voylà quel est le vray honneur, voylà comment c'est le lustre exterior de la vertu: ce que vous m'auiez donné charge de vous expliquer. LE POLEMOPHILE. Maintenant à la verité ie suis contrainct de confesser que i'auoy tort d'estre impatient quand vous vous arrestiez à bien establir la comparaisson de la lumiere à la bonté, puis qu'elle est le fondement d'une si claire cognoissance de l'honneur. Mais parce que vous avez adiousté sur la fin de vostre propos quelque chose des esprits capables de ce lustre, ie vous supplie me donner à entendre quels ils sont, & quels les incapables.

Quels esprits sont capables de ce lustre, & quels incapables.

L'VRANOPHILE. Vous le cognoistrez aisément, si vous regardez quels corps sont capables de la splendeur de la lumiere, & quels incapables; de quoy si vous me demandez mon opinion, ie vous diray qu'à mon aduis il n'y a que deux sortes de sujets, esquels la splendeur de la lumiere retient sa naïfue pureté: Le premier est le corps qui est aussi lumineux de son costé, tellement que par sa propre splendeur il accroist beaucoup celle qui luy suruiét d'autre part: le second est celui qui à la verité n'est pas aussi lumineux, mais toutes fois entierement perspicu & propre à le deuenir estant illustré par vn autre, comme sont toutes choses transparentes. De mesme il nous faut imaginer que le premier genre d'esprits capables de l'honneur d'autrui, est de ceux qui sont aussi vertueux de leur costé, & par consequent pourueus d'honneur, comme l'autre. Le second est de ceux, qui n'ayans encores obtenu la perfection

fection de vertu ; en sont toutesfois admirateurs, studieux, & amateurs: car comme la chaleur digérant tout ce qui est de grossier & terrestre en vn corps, le subtilise & rend perspicu ; de mesme l'amour de la vertu a ceste propriété de rendre les. esprits capables de la recevoir. **LE POLEMOPHILE.** Venez maintenant aux suiets incapables. **L'VRANOPHILE.** Le premier suiet, auquel la splendeur de la lumiere degene de sa premiere condition, est celle sorte de corps, qui à la verité retiennent bien quelque perspicuité, mais elle est toute ceinte, & enseree de l'opacité conioincte, qui rebouche la lueur qu'on luy communique, & la fait degenerer en couleur : Le second genre de corps incapables de ceste lueur, est de ceux qui sont entierement opaques (si aucuns tels y en peut auoir) qui ne la peuuent percevoir en aucune sorte. Non autrement certains esprits en premier lieu cognoissans bien la vertu d'autrui, toutesfois atteints du vice d'enuie rebouchent le rayon de sa renommee, & l'empeschent au possible de s'espandre. En second lieu. Il y en a d'autres qui mesme ne peuuent auoir la cognoissance de la vertu, & pource sont entierement incapables de son lustre, comme sont les insensés & maniaques. Que si vous prenez la peine de collationner en vostre entendement ces suiets de lumiere & d'honneur, les vns aux autres: vous verrez qu'ils se correspondent fort exactement, & en retirerez vn grand esclarcissement pour tous les doubtes qu'au commencement de nostre propos

vous avez apporté contre l'honneur. **LE POLEMO-**
PHILE. Vous estes tombé sur ces doubtes bien
à point, car aussi ie consultoy des-ià en moy-mesme
de vous dire vn scrupule que vous m'auiez laissé
auant qu'entrer au propos de la lumiere. **L'VRA-**
NOPHILE. Quel est ce scrupule? **LE POLEMO-**
PHILE. C'est que vous avez dict que l'honneur ne
depend pas du diuers iugement des personnes, &
qu'il demeure tousiours stable parmy son incon-
stance. Ce qui à mon aduis ne peut estre, d'autant
que comme vous sçauiez les accidents dependent
de leurs suiets & se changent selon leurs change-
mens: Or vous mesme maintenant appelez les es-
prits qui honorent la vertu suiets de sa lueur: qui
me fait pèser qu'aumoins vous ne resoudrez pas ce
doute par ce que vous avez dict de la lumiere d'où
il préd sa principale force: car comme la splendeur
regarde pour son suiet le corps où elle tombe;
aussi l'esprit où tombe le lustre de la vertu, doit
estre dict son suiet, & par consequent ledict lustre
en depend, & se ressent de ses alterations. **L'VRA-**

NOPHILE. Au contraire il me fut esté impossible
de vous resouldre plus ouuertement & plus à pro-
pos que par la comparai-son de la lumiere. Car si
vous y prenez garde, sa splendeur est quasi en deux
suiets tout ensemble; l'un est la lumiere sa sour-
ce, à qui elle est tousiours comme attachee: l'autre
est le corps auquel partant de sa source, elle vient à
tomber: l'estre par qui elle adhere à sa source, luy
est tellement propre & naturel, qu'elle ne peult
subsister

Obiection,
que l'hon-
neur depēd
du diuers iu-
gemēt d'un
chascun.

Responce par
la comparai-
son de la lu-
miere.

subsister sans luy, restant alteree par la moindre variation, qui suruienne à sadicte source. Mais l'estre qu'elle a és corps illuminez, luy est entierement accidentaire, & comme fortuit: si bien que le perdât elle reste neantmoins tousiours aussi accôplie qu'au parauant, signe tres-assuré qu'elle ne depend point de ce suiect. Et qu'ainsi ne soit, ne voyons nous pas celle splendeur, qui nous apporte le iour, demeurer stable & permanente lors mesme que l'air est le plus agité de vents, se retirant ou retournant seulement selon que le soleil se retire ou retourne? Ne voyons nous pas aussi qu'elle ne se diuise point à la diuision de ce sien suiect? Car si au milieu de l'air illuminé vous mettez vn corps opaque diuisant ledict air en deux parts, la splendeur ne restera pas semblablement mespartie en deux portions, vne deçà, & l'autre delà l'opacité interposée, mais d'vn costé l'air sera priué de lumiere & couuert d'ombre: si bien que (chose vrayemēt admirable) restant ainsi tousiours inseparablement vnie avec son principe, elle ne reçoit iamais en soy aucune lesion ny diminution. Qu'ainsi ne soit, si vous ostez cest obstacle, soudain elle s'estendra aussi loing qu'au parauant qu'il fut interposé; ce qui monstre assez qu'elle n'estoit aucunement interessée ny diminuee en vigueur par son interposition. De mesme aussi le lustre d'honneur regarde deux suiects, l'vn est la vertu son principe, l'autre est l'esprit qu'il esclaire, & à qui il faict admirer & louāger sondict principe. L'estre qu'il a au premier suiect, luy est si naturel, que non seulement il se perd

La lumiere
ne depend
point du
corps qu'elle
illumine.

du tout le perdant, mais aussi se ressent de la moindre alteration qui survient à la vertu son origine: Mais l'estre qu'il a au second suiet, luy est au contraire si accidentaire, que le perdant il ne laisse pas de rester entier, & n'est point varié par aucun changement qui aduienne à l'esprit où il se rencontre partant de son principe. Et voylà comment ce que vous auiez allegué de la fresse & caduque inconstance de l'honneur, demonstre seulement l'imperfection des suiets où il tombe, & non pas de luy mesme, qui demeure tousiours stable parmy les assiduz changemens des esprits humains tantost vertueux, tantost seulement studieux de la vertu, tantost vicieux & enuieux, & bref tantost insensés & prieuez de celle lumiere qui nous fait sainement apprehender vne chose. D'où vous pouuez apprendre qu'une personne iniurée ne doit pas tant tascher de pallier exterieurement ce deshonneur faisant mourir l'interessant, comme d'acquiescer ou conseruer soigneusement la vertu qu'il nous denie, laquelle en fin emplissant de son lustre les cœurs capables, fait aisément recognoistre l'interessant pour incapable: Tout ainsi qu'un malade pour oster sa passeur ne se doit pas farder, mais soudain recourir au recouurement & conseruation de sa santé interieure, qui avec soy rapportera la viue & nayfue couleur. Et en cecy se trompent lourdement auourd'huy nos Gentilshommes; qui s'estudient plus à conseruer cest exterieur lustre d'honneur, que la vertu interieure; d'où s'ensuit que celle leur reputa-

tion

Pour conser-
uer son hō-
neur, n'y a
meilleur
moyen, que
se rédre ver-
tueux.

tion delaissee de son fondement & principe naturel, n'est de longue duree, ains s'esteint facilement; car comme la chaleur en l'eau desiointe-d'auec le feu, est aussi tost repoussée par l'effort du principe naturel de la froideur, qui est la substance de l'eau: de mesme l'apparent lustre du faux honneur est soudainemet esteint par les tenebres du vice contraire caché dessous. C'est doncques le faux honneur seulement qui est fragile & caduc: mais il le faut autant fuir, comme ambitieusement rechercher le vray, qui ne peut estre offensé ny diminué par la mauuaise opinion des esprits mal disposez: d'autant que ce nonobstant il reste tousiours inseparablement attaché & vny à la vertu, de qui seule il depend: de sorte que si ces esprits deuenoyent bien disposez, soudain il espendroit ses rayons en eux auec autant d'efficace que s'il n'eust iamais esté supprimé. Parquoy la mauuailtie des enuieux meldisans ne defraude aucunement la vertu de l'honneur son salaire, comme vous disiez: ains sa splendeur seroit aussi entiere & parfaicte si tout le monde en estoit priué, comme si elle reluisoit en l'esprit d'un chascun, tout le changement estant du costé de ceux qui maintenant capables en sont remplis, & puis incapables le reiettent. LE POLEMOPHILE. Il me semble que vous estes encouru en vne manifeste contradiction, disant d'un costé que la vertu est principe de l'honneur, & d'autre costé approuuant le dire de ceux qui veulent l'honneur estre le salaire de la vertu. Car la recompence doit tousiours estre meilleure que

les moyens, par qui on tafche de l'acquérir: fi donques par les actions vertueufes on tend à l'honneur comme à leur falaire, il faut neceffairement que l'honneur foit quelque chofe plus digne & eftimable que la vertu: Au contraire fi la vertu eft principe de l'honneur, qui niera qu'elle ne luy doiuë eſtre preferee, cōme receuât toute fa perfection, & dependant entierement d'elle? L'VRANOPHILE. A la verité il n'y a rien hors la vertu qui foit plus precieux qu'elle, & par conſequent qui puiſſe eſtre ſa recompence: donques ſa perfection meſme eſt ſon falaire, & parce que l'honneur accompagne & enfuyt touſiours neceffairement l'interieur accompliſſement de la vertu, voilà pourquoy on luy attribue auſſi par vne certaine conſequence le titre de ſon falaire: Ainſi la paix, la ioye, l'immortalité ſont dictes quelquefois eſtre la felicité humaine d'autāt qu'elles accompagnent l'action qui nous rend veritablement bien heureux: c'eſt à ſçauoir la viſion & amour de Dieu. Ainſi les ſçauans perſonnages aſſeurent que la fin des natures & eſſences eſt leur operation exterieure, qui eſt le plus certain indice de leur accompliſſement interieur: car autant qu'une chofe eſt interieurement parfaicte, autant eſt-elle exterieurement actiue. Mais qui voudroit parler plus proprement, pourroit dire au contraire que la fin de l'honneur eſt la vertu, tout ainſi que les actiōs auſſi ſont finalement ordonnees pour les natures agiſſantes: car l'honneur eſt comme vn accident de la vertu, & les accidents ſont pour les ſubſtances, & ſc

Comment
l'honneur eſt
le falaire de
la vertu.

se referent à elles comme à leur fin essentielle. Excusés moy si i'vse de mots si rudes & nouveaux à nostre France, car la nonchalance de nos predecesseurs est cause que les termes propres des plus hautes sciences ne soyent pas encores receus en nostre langue, sans lesquels toutesfois il est impossible d'exprimer tout plein de belles conceptions. **LE POLEMOPHILE.** Il n'est ià besoing d'excuse en mon endroit pour cela, n'estant pas de ceux qui pervertissans le vray ordre naturel, font seruir les conceptions aux parolles, & non les parolles aux conceptions: ioint aussi qu'à present mon intétion n'est que de perfectionner mon esprit par la cognoissance de la verité; & quand ie voudray cōplaire à mon ouye, i'appelleray des musiciens qui me rendront le son des parolles assez agreable. Et bref (pour vous dire libremēt ce que i'en pēse) ie n'admits autre Rhetorique, autre artifice de parolles, que celuy qui les ioint & cōpose si bien ensemble, qu'elles impriment en nostre entendemēt vne conception bien ordonnee & bien distincte, laissant à part celle vaine & affectee recherche de belles parolles superflues, & celle exquise discretion de mots vieux ou nouveaux, qui me sont tous vns, pourueu qu'ils soyent intelligibles. Mais pour retourner à nos erres, vous m'avez tresbien satisfaiēt touchant tous les doutes que i'auoy proposez au commencement, si ce n'est d'un seul qui reste encores sans resolution. **L'VRANOPHILE.** Quel est-il? **LE POLEMOPHILE.** Pourquoi on doit postposer la vie à l'honneur, puis qu'il n'est

Contre certains Philologes.

Comment
l'honneur est
bien de for-
tune, & bien
d'esprit.

n'est qu'un bien extérieur & de fortune? L'VRANOPHILE. La réponse se peut aisément tirer des propos précédens; car selonc c'est estre accidentaire de l'honneur par qui il esclaire les esprits d'autrui à recognoistre & s'humilier à son origine la vertu, ie ne nieray pas que l'honneur ne depende de la fortune, & ne soit bien extérieur de l'honoré: d'autant que les diuers accidens qui suruiennent aux esprits, & les font maintenant capables, maintenant incapables de ceste lueur, sont cause que maintenant elle aye son estre esdicts esprits, & maintenant elle le perde. LE POLEMOPHILE. Pourquoy attribuez-vous cela à la fortune? L'VRANOPHILE. Parce qu'il ne prouient pas de l'honneur, ains d'une cause qui luy est entièrement externe, & n'a aucune liaison naturelle avec luy, & pource luy est fortuite & casuelle. Mais selonc l'estre qui luy est propre & naturel, c'est auoir par qui il est attaché & adhere à la vertu son origine, estant comme vne sienne propriété inseparable, il doit estre estimé bien de l'esprit, aussi bien que la vertu, & non pas de fortune, tout ainsi que les accidens des corps sont dictz corporels. Parquoy comme il ne faut pas auoir autrement soin de l'estre accidentaire de l'honneur, non plus que des autres biens extérieurs, & qui sont en la main de fortune: de mesme faut-il postposer à la perte de son estre naturel la perte de la vie, qui n'est qu'un bien corporel seulement; laçoit qu'auourd'huy se pratique le contraire, car on n'espargne pas la vie pour retenir ceste fuyarde reputation, qui
s'effa

s'efface des esprits humains par iniurieufes calomnies; & tout au rebours on ne se foucie pas de faire quelque acte derogeant à la vertu pour espargner sa vie. **LL POLEMOPHILE.** Si me confesserez-vous qu'encores faut-il auoir quelque soucy de l'opinion mauuaife qu'on conçoit de nous, iacoit que fausse; cela nous estant enseigné par la nature mesme, qui nous y pousse. **L'VRANOPHILE.** La perfection Chrestienne nous appelle à vn estat plus que naturel, & deracine tous ces aiguillonemés, qui procedent d'une trop grande amour de soy mesme, comme tous les autres desirs de vengeance. Non pas que ie vueille nier pourtant, qu'il n'y aye des considerations, qui nous peuuent iustement mouuoir à prendre les armes pour l'honneur, encores selon son estre accidentaire seulement; car il ne faut point douter qu'on ne doyue employer sa vie pour maintenir l'honneur de Dieu; surquoy est fondee toute la guerre qu'on fait aux infidelles; iuste, d'autant que la religion est vn bien general de toute l'humaine espee, & que le bien commun doit tousiours estre preferé au particulier: qui est aussi la cause pourquoy si nous auons charge publique, & que la mauuaife opinion qu'on a de nous apporte interest au public, nous deuons librement exposer nostre vie pour esteindre ceste mauuaife estime: Mais si nous sommes personnes particulieres, & qui n'aspirions aucunement aux charges des affaires du commun, c'est vne pure folie de se formaliser de toutes les opinions qu'on conçoit de nous mal à propos, & suffit

Quand, & quelles gés se doivent foucier d'estre en mauuaife estime.

de conseruer l'estre propre & naturel de l'honneur, cultiuant si diligemment celle semence des vertus que la nature nous a empreinte en l'ame, qu'en de- pit de toutes medifances elle espanse plus vigou- reusement, comme la palme, les branches de sa re- putation à la veüe de tout le monde. Et notez qu'il y a trois degrez de reputation qui nous attouche: en premier lieu est celle de Dieu, & puis la nostre, troisiemement celle de nostre prochain; & tout ainsi que Dieu nous est plus intime que nous mes- mes, & nous mesmes nous sommes plus intimes que nostre prochain; de mesme nous deuons auoir plus de soing de l'honneur de Dieu que du nostre pro- pre, & plus du nostre que de celuy de nostre pro- chain. **LE POLEMOPHILE.** Mais est-il necessaire pour reparer toute sorte d'interest d'honneur indis- feremment, exposer & hazarder sa vie, ou si on y peust quelques fois remedier par autre voye? **L'VRANOPHILE.** Il suffit à celuy qui est appellé vi- cieux de demantir l'iniuriant pour recouurer son honneur. **LE POLEMOPHILE.** La coustume à la verité est bien telle auiourd'huy, mais pourquoy est-ce qu'un desmantir est plus picquant qu'une au- tre iniure, & peut suffisamment reparer l'interest qu'elle apporte à la reputation? **L'VRANOPHI- LE.** L'honneur d'un homme est interessé lors qu'on le deboute du nombre des suiets qui en sont capa- bles, desquels nous auons veu cy dessus deux de- grez: le premier est des esprits de leur costé ver- tueux, d'où nous sommes demis par les iniures qui nous

Degrez de
reputation
qui nous at-
touche.

Le demantir
efface vne
iniure, & la
folie l'inte-
rest du de-
mantir: &
pourquoy.

nous

nous attribuent quelque vice particulier : Le second est des esprits non pas encores vertueux , mais amateurs neantmoins & studieux de la vertu , & de ce rang on est exclus par le demantir , qui nous colloque au premier degré des suiets incapables , nous concedant bien la cognoissance de la vertu d'autrui , mais adioustant que par enuie nous la dissimulons , & supprimons : car mantir proprement n'est autre chose que cacher la verité cogneuë. Que si le demantant paroît fol & insensé (qui est le dernier degré des esprits incapables) celui qui est demanty ne reste aucunement interessé. LE POLEMOPHILE. A vostre conte donc estant demanty , il ne faudroit pas encor venir aux mains , mais suffiroit d'appeller fol le demantant , ce qui toutesfois n'est point vsité , & semble du tout ridicule. L'VRANOPHILE. Si me confesserez-vous (à mon aduis) qu'on ne se doit picquer des parolles d'un fol , si bien que si un maniaque & insensé vous demant , sa folie l'excuse de telle sorte que mesme ce seroit vne plus grande folie à vous de vous en mettre en action. Mais d'autant que ceste imperfection est de soy mesme tres-apparente on s'arreste au demantir , ou le mesprisant , si on presuppose au demantant la manie ; ou s'en ressentant , si on presuppose le contraire. Ce n'est pas le mesme de la manterie , qui n'est le plus souuent apparente qu'à Dieu seul , tant elle sçait artificiellement se masquer de la verité sa contraire , & pource on ne la presuppose pas comme la manie. LE POLEMOPHILE. Le

Quelle différence il y a entre dire qu'il n'est pas vray, & demantir.

fuis entierement satisfaiët de ce costé: Mais ie vous veux maintenant (à propos des demantirs) proposer vne question, qui m'a faict souuent arrester à l'examiner; C'est, qui vous semblent auoir raison, ou les Italiens qui ne s'estiment point interressez s'ils ne sont formellement demantis: ou bien les François qui au contraire se tiennent autant picquez si vous dictes leurs parolles n'estre pas vrayes, comme si vous les demantiez? L'VRANOPHILE. Pour moy, ie tiens qu'il ne faut pas estre si aisé à esmouuoir que les François, ny si difficile que les Italiens. Qu'il ne faille pas estre si aisé à esmouuoir que les François, il est tout manifeste: Car (ne dire pas vray) n'est pas le mesme que, mantir: Parce que mantir est sçauoir bien le contraire de ce qu'on dict: Mais qui ne voit que quelqu'un peut bien asseurer vne chose qui n'est pas vraye, pensant toutesfois qu'elle le soit, trompé ou par le faux rapport d'autrui, ou par son propre soupçon & coniecture? Or qu'il faille aussi estre moins difficile à esmouuoir que les Italiens, c'est vne chose toute claire: car il est impossible d'asseurer vne mensonge pour vraye, qu'il n'y ayt quelque defect, pour le moins de legere creance, vice fort pernicieux en vne personne publique, qui seule se doit soucier de toutes ces offences, comme ie vous ay dict. Pour conclusion donques il me semble qu'estant reprins de dire vne chose pour autre, il est necessaire, & suffit aussi, de donner vn desmantir dessus, qui est le vray reparateur de toutes outrages & iniures. Bref notez diligemment que ny l'in-

iurié

iurié ny le demanty ne doyuent recourir aux armes & à la violence, s'ils peuuent faire paroistre par raisons ou l'iniuriant estre menteur, ou le deman- tant estre insensé: que si on voit la raison n'auoir lieu, & toutes allegations estre inutiles, alors (le public y estant interessé) il est permis de tascher le faire paroistre par armes: en quoy consiste la vraye vaillâce, vertu propre d'un soldat, & qui (à mon ad- uis) marche au premier rang de celles, qui dominent aux passions. Mais il est deormais temps de mettre fin à ce propos, & se retirer: car la nuit s'approche.

LE POLEMOPHILE. N'esperez pas que ie le per- mette, si premierement vous ne me promettez de retourner demain en ce lieu, pour me donner au lóg à entendre qu'elle est celle vertu de vaillance, que vous dictes estre propre d'un soldat: à fin qu'auant m'embarquer plus auant en ceste profession, ie re- cognoisse combien i'en suis esloigné: car n'ayant au- cune esperâce de l'obtenir, i'ayme beaucoup mieux rester icy avec mes liures, que prendre tant de peine pour mettre en euidence mon imperfection.

L'V- RANOPHILE. Je vous ay desia souuent asseuré que ie ne m'espargneray iamais en ce qu'il vous plaira m'employer, & pource, que cela ne soit pas cause de vous faire commencer par moy les actes violents de vostre nouuelle profession, me retenant icy par for- ce plus long temps. A ce mot sous-rians tous deux ils se leuerent, & costoyans l'argentín crystal d'Al- lier, puis regaignans la cime du roc, en fin ils arri- uerent à leur coustumiere demeure; restant Pole-

30 DIALOGVE DE L'HONNEVR.
mophile autant bien edifié des propos de l'Vrano-
phile son compagnon, comme luy au contraire
mal edifié de sa deliberation, d'où s'ensuiuoit
le debauchement de ses estudes, esquel-
les il promettoit beaucoup de foy,
pour la viuacité de son
entendement.

* * *

FIN DV PREMIER DIALOGVE.

SPES, SI FATA VALENT.



A MON FRERE, LE CHEVALIER D'VRFE'.

*De la preference des Platoniciens aux autres
Philosophes.*



IE me plains à vous, cher frere, de ce malheureux siecle où nous sommes, qui repreuue comme faux tout ce qu'il n'a pas accoustumé d'ouyr: comme si sa cognoissance estoit la regle de la verité des choses, au lieu que s'il estoit vn peu plus modeste, il se cōtenteroit de prendre la verité au cōtraire pour regle de sa cognoissance. Je dy cecy, parce que i'ay sceu par quelques miens amys, que plusieurs ayāt gousté la lecture de mon petit Dialogue de l'Honneur, ont trouué de si mauuaise digestion la preference que i'y dōne à la secte Platonique sur toutes les autres, que pour cest accessoire ils ont reietté aussi toute l'œuure, la condannāt d'opinions extrauagantes & faus-
ses. Et si vous me demandez quelle raison les meut à n'admettre ceste preference, sçachez qu'ils n'ont iamais rien leu de Platon, sinon ce qui est cité es li-

ures d'Aristote & ses interpretes : & pource ils le desappreuuent , comme si Platon ne pouuoit estre à la verité plus grand personnage , qu'il n'est cogneu d'eux ; & comme si leur cognoissance ou ignorance caufoit l'excellence ou defaut des autheurs. Voylà la vraye source du peu d'estime qu'ils font de Platon : mais pour coulorer quelque peu leur opinion, ils alleguent que la Philosophie Platonique est seulement fondee sur des belles conceptions destituees de toutes preuues, de toutes demonstrations, de toutes raisons ; au lieu que l'Aristotelique ne dict rien qui ne soit soudain confirmé par plusieurs argumens de telle efficace qu'ils contraignent à croire ce qui est dict, sans contradiction ; par ce qu'à la fin ils prouoquent, & appellent au iugement des sens, qui ne peuuent errer lors qu'ils sont en bonne disposition : les Platoniciens au contraire ne font que bastir des chimeres abstraites, ne bougeans de leur monde intelligible, qu'un chascun se compose à sa poste, & l'estime veritable, pourueu qu'il le puisse concevoir : comme si nous ne pouuions pas apprehender beaucoup de choses qui ne sont pas veritablement en estre. Mais toutes ces obiections sont entiere-ment vaines & friuoles : & encores que i'eusse delibéré de dissimuler tout cecy iusqu'à l'edition de mes epistres philosophiques, où i'espere avec l'ayde de Dieu traicter plus exactement ceste matiere, si ne me suis-je peu tenir de vous en escrire cependant ce mot, pour m'en decharger quelque peu le cœur, & vous cōstituer arbitre de nostre different, à fin qu'a-
pres

pres m'auoir donné quelque peu d'audience, vous
 fassiez taire tous ces mesdisans; car ie suis certain,
 selon l'equité de ma cause, que vostre decret se-
 ra du tout en ma faueur. Et pour m'accomoder à
 eux, ie procederay seulement par les principes de
 leur Aristote, & les prieray de se ressouuenir de ce
 qu'il tesmoigne en plusieurs endroits; c'est qu'il y a
 deux puissances en nostre ame, auxquelles appar-
 tient la cognoissance de la verité: l'vne est nommee
 Raison & Discours, qui va inferant vne verité inco-
 gneuë d'une cogneuë, tantost descendant des cau-
 ses aux effects, tantost remontant des effects aux
 causes. Ce qui est figuré par l'eschelle, sur qui Iacob
 voyoit en dormât les Anges alternatiuement mon-
 ter & descendre, Dieu estant à la cime, comme la
 cause, à qui se terminent routes les autres causes.
 L'autre puissance est appelée Intelligence, ou En-
 tendement; qui sans s'elgarer en tant de discours &
 consequences, contemple de pied ferme la verité
 de toutes choses sous les rayôs d'une lumiere beau-
 coup plus haute que celle de la Raison. Ce qui est
 (à mô aduis) signifié par la lutte de Iacob avec l'An-
 ge; car ceste sorte de cognoissance estant propre
 des Anges, qu'est-ce y vouloir atteindre, sinô com-
 battre avec eux, & tâcher d'egaler leur force & per-
 fection? En quoy reluyt fort la dignité de l'Homme,
 qui se transformant en telle nature qu'il luy plaist,
 nō seulement peut degenerer en beste par les volu-
 ptez corporelles: mais aussi se regenerer en Ange &
 fils de Dieu par la sainteté & contemplation, arre-

Deux puis-
 sances intel-
 lectiues, le
 Discours, &
 l'Intelligen-
 ce.

Dignité de
 l'homme.

Difficulté de
passer du di
scours à l'in
telligée en
cette vie.

stant le cours vagabond du cercle de la Raison en l'immobilité de son centre, qui est l'Intelligence: chose vraiment tres-difficile à cause de mille empeschemens, qui en ceste vie troublent la veüe de nostre esprit, & la debilitent de telle sorte, qu'il faut approcher nostre lumiere intellectuelle à tous les obiects successiuement l'vn apres l'autre: Toutes-fois il ne faut nier que quelques rares personages (& entre autres les vrays & legitimes Platoniciens) separans la plus diuine partie de leur ame d'auec les phantastiques illusions des sens, n'y soyent aucunement paruenus: aucunemēt, dis-ie, parce qu'il estoit impossible d'y atteindre parfaitement, n'eust esté la faueur souueraine du Verbe incarné, qui en est la porte, comme il tesmoigne luy-mesme, & qui donne puissance à ceux qui croient en son nom d'estre aussi faiçts fils de Dieu. Parquoy ce que mes malings censeurs alleguoyent contré les Platoniciens fait pour eux: les preferant d'autant aux autres que la sapience doit estre preferee à la science, & l'intelligence au discours; & les Anges aux hommes. Et qu'ils ne croient plus, qu'on puisse conceuoir entierement vne fausseté: car Dieu ayant doué nostre esprit naturellement des semences de toute verité, luy a par mesme moyen infuse vne telle antipathie avec toute fausseté, qu'il ne se peut non plus conformer à elle, qu'elle à ses principes: admettant tousiours en soy quelque diuision & contradiction, qui cause & entremelle necessairement de l'obscurité en son apprehension, & par consequent l'empesche

Conclusion
renuersant
l'argument
cōtraire cō-
tre ses au-
teurs.

On ne peut
concevoir
entieremēt
vne fausseté.

de se pouuoir totalement conformer & appliquer à nostre entendement, cela luy estant permis seulement selon la partie qu'elle a de veritable: car il n'y aucune fausseté qui ne soit appuyee sur quelque verité, cōme il n'y a defect qui ne soit appuyé sur quelque perfection. Voylà brieffuement ce que i'auoy deliberé vous deduire pour la defense des cōceptions Platoniques: lesquelles toutesfois ie vous confesseray bien deuenir entierement friuoles, vaines, & ridicules, lors qu'elles tombent en certains esprits incapables & mal disposéz: car tout ainsi que la lumiere obscurcit plustost la veuë d'un œil mal disposé, qu'il ne luy ayde à voir plus clairement, ce qui neantmoins est son propre office: de mesme toute sorte de cognoissance, d'autant qu'elle est plus eminente, est aussi rendue plus vaine & inutile, lors qu'elle se rencontre en un esprit incapable & disproportionné; comme doit estre celuy des ennemis de Platon, qui se font accroire que ses conceptions ne soyent pas mieux fondees, & plus parfaites d'elles mesmes, qu'en leur entendement: où elles degenerent infiniment de leur naturelle perfection & efficace, qu'on peut remarquer estre tresgrande, mesmement par l'analogie que ie declare en mon Dialogue, & qui m'a occasionné d'y louer Platon: car tous les argumens & ergotismes du monde n'eussent peu demonstrier plus clairement les proprieté de la Bonté, que la comparaison de la Lumiere. Par ainsi ie vous prie (cher frere) d'embrasser ma cause; & ie ne craindray plus la mesdi-

Les conceptions Platoniques deuiennent friuoles és esprits disproportionnez.

fance de mes aduersaires, qui seront contraincts ce-
 der à la verité, voyans leur fard decouuert
 par les outils mesmes dont il estoit faict,
 c'est à scauoir par le bien dire, qui
 semble estre comme nay
 avec vous, tant il
 vous est na-
 turel.

SPES, SI FATA VOLENT.

A MON

A MONSIEVR ANT. EMANVEL
CHALOM, DOCTEVR E'S DROICTS,
ET VICAIRE GENERAL
substitué en l'Archeuef-
ché de Lyon.

* *

Des degrez de Perfection.



MONSIEVR, dernièrement certaines personnes coustumieres de n'appreuuer rié qui ne parte d'eux, apres auoir legerement passé l'œil sur mon opusculé de l'Honneur, plustost que le laisser eschapper sans quelque dentee, ont mieux aymé le reprendre iniustement: & pour authoriser d'auantage leur accusation, se sont adressez contre la comparaifon que i'y fay de la Lumiere à la Bôté, qui est le fondement de tout le reste du discours. Ce n'est pas merueille (disoyent-ils) si l'Auteur, ayant commencé à comparer la lumiere à la Bonté en general, s'est tourné à la bonté del'Ame particulièrement, qui est la Vertu: car s'il eust voulu pourfuiure sa premiere pointe (comme à la verité il deuoit faire, pour rendre sa dispute exactement accomplie) ceste entre-prise ne pouoit reussir qu'à son des-honneur.

Contre la
comparaifon
de la lumie-
re à la bôté
obiections.

Comment eut-il fait respondre les suiets de bonté à ceux de lumiere, veu qu'à son conte le premier est de soy mesme lumineux, & neantmoins reçoit la splendeur d'un autre pareillement lumineux de soy mesme, comme quand les clartez de deux torches viennent à se rencontrer & vnir: Au lieu qu'il ne peut estre qu'une chose de soy mesme bonne, qui est Dieu, le reste estant bon seulement par sa liberalité: au lieu, dis-je, que ce qui est bon de soy mesme, estant tout-parfaict, n'est capable de recevoir en soy quelque nouvelle bonté d'autrui: Parainsi la comparaison cloche de ce pied: & si nous passons plus outre, nous verrons qu'elle ne cloche pas moins encores d'un autre: Car l'Autheur veut que la splendeur, en quelque degré qu'elle soit, ne puisse iamais estre interessée, ny des-vnie d'avec son principe: au lieu que nous voyons les perfections & formes naturelles estre entierement caduques & perissables. Voylà toutes les raisons de mes censeurs: car quant à ceux qui m'accusent de n'auoir pas bien entendu la nature de la lumiere, ie m'assure que dans peu de temps ils iugeront que ce n'est pas du tout sans raison, que ie luy ay attribuees, ou plustost restituees quelques proprietiez, que les sophismes luy auoyent desrobees entre les Philosophes d'auourd'huy. Cependant i'aduouïeray librement aux autres, que la comparaison de la lumiere à la bonté n'est pas telle, qu'elle n'admette quelque dissimilitude: ce ne seroit pas une ressemblance autrement, ains une mesme chose, si bien qu'à la verité il ne peut estre qu'une chose

Obiection
de quelques
autres.

chose bonne de soymesme, au lieu que plusieurs corps peuuent estre d'eux mesme lumineux. Et la raison en est toute euidente: car ce qui est generale-ment bon, ne peut estre qu'un seul, d'autant qu'en deux choses distinctes il est necessaire qu'une aye quelque chose que l'autre n'aye pas, autrement elles ne seroyent aucunement distinctes, mais vne mesme, tellement que l'une & l'autre ne peuuent estre generalemēt parfaites, puis qu'à l'une defaut quelque chose de l'autre. Or ce qui est de soymesme bon, est generalement bon & parfait; car chascune chose desire se rendre tres-parfaicte, si bien que dependant seulement de soymesme quant à sa perfection, sans doute elle ne la bornera iamais à un certain degre. Parainssi ce qui est de soymesme bon, ne peut estre qu'un seul. Mais ce qui est de soymesme lumineux, tout ainsi qu'il n'est pas generalement parfait, aussi peut-il estre multiplié, & receuoir plusieurs degrez, comme l'experience nous monstre. Sera-il donc du tout impossible d'appropriier les suiets de bonté à ceux de lumiere? Au contraire il n'y a rien qui s'accorde mieux, & qui nous amene plus facilement la cognoissance des plus hauts mysteres de la Philosophie, & Theologie. Et comment cela, veu qu'une chose de soymesme lumineux se peut estendre ses raiz en vne autre pareillement lumineuse de soymesme, & la Diuinité ne peut estendre les siens en rien de diuers à soy, qui soit bon de soymesme, comme elle? Pauures aueuglez, qui ne voyez pas la verité, & cependant elle vous

Ce qui est bon de soymesme, ne peut estre multiplié.

Appropriation des suiets de lumiere à ceux de bonté.

Appropriation du premier, où est monstre comment le Fils en la Diuinité procede du Pere, comme lumiere de la lumiere.

touche

touche les yeux ! si la Diuinité ne peut estendre ses
 raiz & sa bonté en rien de diuers à soy , qui soit bon
 de soy-mesme comme elle , que s'ensuit-il , sinon
 qu'elle les estende en quelque chose qui soit mesme
 à soy ? D'où se tire vne belle cognoissance de la plura-
 lité des personnes en l'vnité de l'essence diuine : & à
 fin que ceste distincte vnité soit rendue plus claire
 par la cōparaison de la lumiere, de deux corps lumi-
 neux, ostez ceste corporalité (s'il faut ainsi dire) qui
 est conioincte à leur lumiere , & comme les person-
 nes diuines ne sont rien que pure bonté, laissez aussi
 ces deux lumieres pures: elles ne seront qu'une seule
 lumiere, estant tellement vnies , qu'on n'y scauroit
 remarquer aucune separation & diuision: elles ne
 seront pas aussi pour cela meslees & cōfondues l'une
 avec l'autre, mais tousiours resteront distinctes, cōme
 on recognoit en ce qu'elles se peuuent separer l'une
 de l'autre , chascune retenant sa propre integrité. Je
 croy que ceste ressemblance de la lumiere à la Tri-
 nité a meu le Concile de Nice de mettre en son sym-
 bole que le Fils procede du Pere , comme lumiere
 de la lumiere. Et d'icy encores se peut tirer l'intelli-
 gence d'un passage de la Sainte escriture, où le Fils
 demande à son Pere d'estre clarifié de celle clarté,
 dont il l'auoit clarifié auant tous les siecles. Mais ne
 volons point si haut pour ce coup ; & ayant assez
 parlé du premier suiet des raiz partans de la bon-
 té diuine, semblable au corps de soy-mesme lumi-
 neux ; courbons nos ailles plus bas , & venons au se-
 cond semblable au corps perspicu & transparent,
 qui

qui n'est pas de soy-mesme bon, mais est rendu tel par autrui: si bien que sa bonté n'admet autre imperfection, que de dependre d'un autre, & auoir perpetuellement besoing de sa presence. Telle est celle substance intellectuelle, qui est sequestree de tout corps, & par nos modernes Theologiens est appelée Angelique, qui obtient vne bonté autant pure, que sans matiere: non toutesfois de soy-mesme, mais par la liberalité de Dieu son createur & cōseruateur: si bien que non seulement elle est premiere-ment deriuee de son infinie secondité, mais aussi est conseruee perpetuellemēt par son assistance & presence, sans laquelle elle retomberoit en ce Rien, dōt elle a esté creēe: tout ainsi que la representation d'un visage en vn mirouër est faicte, & ne dure que par la presence du visage: & tout ainsi que la piste du pied en l'eau s'euapouyt aussi tost que le pied en est retiré. Venons au troisieme suiet semblable au corps eoulouré, de qui la perspicuité est limitee par l'opacité: C'est celuy, qui reçoit bien les raiz de bonté, mais degēerans de leur naturelle pureté: c'est, dis-je, la substance corporelle, de qui la forme & perfection est limitee par la priuation inseparablement conioincte à la matiere, & à ceste cause est diuisee en plusieurs indiuidus: tout ainsi que la lumiere vniforme en soy, est diuersifiee en plusieurs sortes de couleurs, esquelles elle degēere. Finablement le quatrieme suiet, semblable au corps du tout opaque & tenebreux, n'est autre que ce Rien imaginai-
re, qui n'a ny estre, ny essence, & par ce moyen est

Appropriation du troi-
sieme.

Appropriation du qua-
trieme.

exclus de toute perfection & bonté. J'appelle maintenant mes censeurs mesmes pour tesmoins, s'il se peut rien voir de mieux correspondant que ces sujets de lumiere, & de bonté. De vous (Monsieur) ie n'ay iamais fait aucun doute que vous ne fussiez de ceste opinion, & n'a pas esté mon intention de vous adresser ce discours, comme vne leçon ou remonstrance: mais i'ay imité la nature, qui estant offensée recourt soudain à son premier fondement & principe, c'est à dire au cœur: car de mesme me sentant offensé de mes critiques, i'ay recours à vous, comme à la plus ferme colonne de ma defence, & au plus assuré fondement de ma cause, qui peut donner vie à toutes mes raisons, mortes d'elles mesmes, ainsi que le cœur à toutes les parties du corps.

La bonté ne
depend des
suiets aux-
quels elle se
communi-
que.

Venons maintenant à la seconde calomnie, qui à la verité requiert vn plus long propos, qu'il n'est permis d'enclorre d'as les bornes d'une epistre: & pour ce me reseruant à vn autre temps, ie diray seulement de mot en passant, que comme la splendeur ne depend point des corps, où elle tombe: de mesme ny la bonté diuine des creatures, esquelles elle s'estend: d'où se recognoist l'erreur de ceux qui estiment les creatures estre necessaires à l'integrité de la perfection diuine. Le rayon aussi des formes & idees ne depend pas de la variation des indiuidus corporels, ains se retire en son principe lors que le sujet s'en rend incapable, & puis retourne à se communiquer & estendre lors qu'il deuiet bien disposé à le receuoir: d'où s'ensuyt estre tres-veritable ceste proposition

position si commune entre les doctes , que les essences & especes de chasque chose sont ingenerables & incorruptibles ; qui seule suffit pour rembarer la medifance de mes aduerfaires sur ce poinct. Et quât à ce qu'ils difent que pour rendre mon Dialogue exactement accomply , i'y deuoy adioufter tout ce traicté , ie ne me veux point peiner de leur répondre : eftant vne chose toute claire , que par ceste si longue digreffion le discours fut resté priué de l'ordre, perfection sur toutes recōmandable, & que i'ay accouftumé d'appeller ame de la science. Maintenant c'est à vous, Monsieur, de iuger de ma cause, & par mefme moyen auffi de m'excuser si i'ay prefumé vous diuertir de vos plus ferieufes occupations par ceste fâcheufe lecture:mettez-en toute la coulpe sur l'estat que ie fay de vofre amitié, la iugeant par celle que ie vous porte. C'est elle qui m'a fait vous efcire cecy : car tout ainfi que ceste vie est vne mort fans l'amitié, auffi i'estime l'amitié estre vne inimitié fans vne reciproque communication de tout ce qui nous poife sur le cœur.

SPES, SI FATA VOLENT.

